

四庫全書

子部

# 欽定四庫全書

子部

山堂肆考卷二百七十三

四

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣葉蘭

謄錄監生臣汪兆鼎

欽定四庫全書

山堂肆考卷一百七十三

明

彭大翼 撰

宮室

堂

釋名堂謂堂堂高顯貌一云堂當也又明也

萬金

漢靈帝中平二年造萬金堂於西園引司農金錢繒帛  
物積堂中

四寶

堂在徽州府治以郡出文房四寶為義

斷機

堂在鄒縣治東以孟母斷機教子為名

戲綵

宋趙岫元豐中為溫倅時其父清獻公抃致仕家居岫迎以就養因取老萊子戲綵之義名堂清獻詩云我憇堂中樂可知優游踰月意忘歸老萊不及吾兒少且著

朱衣勝綵衣又宋廖剛字用中累世以華髮奉養曾大母年九十三曾大父年八十八公名其堂曰世綵諫議陳公等播之聲詩名世綵集

平山

堂在揚州蜀岡上宋慶厯中郡守歐陽脩建江南諸山拱列簷下因名平山沈括為記王安石詩城北橫岡走翠虬一堂高視兩三洲淮岑日對朱欄出江岫雲齊亂瓦浮

列岫

堂在成都府茂州治因九頭山列於南屏風盤臺列於西巨人橐駝列於東故名

三賢

堂在孤山有白居易林逋蘇軾三賢像尚存又四相堂在成都府崇慶州治唐時建以張柬之鍾紹京李嶧王縉四公皆牧是州故名

六客

堂在湖州郡治園中宋元祐中知州張詢作六客詞序  
云昔李公擇為此郡張子野劉孝叔在焉而楊元素蘇  
子瞻陳令舉過之會於碧瀾堂子野作六客詞傳於四  
方今僕守是邦子瞻與曹子方劉景文蘇伯固張乘道  
來過與僕為六而向之六客獨子瞻在故復繼前作子  
野為前六客詞子瞻為後六客詞

偃月

唐李林甫有堂如偃月號偃月堂每欲擯斥大臣則居

此堂思中傷之

聚星

堂在鳳陽潁州治歐陽公守郡日建有聚星堂集

歌鳳

堂在嘉定州之三我館館中繪楚狂接輿像於壁

歸鴈

唐虞世南侍宴歸鴈堂詩歌堂面淶水舞館接金塘竹  
開霜後翠梅動雪前香鳬歸初可侶鴈起各分行刷羽



同樓集懷恩愧稻梁

七葉

白樂天七葉堂詩鬱鬱復鬱鬱此熱何時畢宜人七葉  
堂煩暑隨步失簷雨稍霏微牕風正蕭瑟清閒一覺睡  
可以消百疾

一枝

堂在黃岡縣宋時建堂前有大梅取一枝向暖之義

舍蓋

蓋公堂在諸城縣境內蘇軾守膠西建自為之記昔曹  
參為齊相問蓋公所以安集百姓蓋公為言治道貴清  
淨而民自定參於是避正堂以舍蓋公參用其言而齊  
大治

頌僖

堂在南安府學宋知軍管銳增修學舍士民德之立生  
祠於學宮扁曰頌僖取魯僖公修閼宮而詩人頌禱之  
義

一經

堂在鳳翔府隴州治東唐太守韋臯建取漢韋賢一經  
教子之義

萬卷

蘇子瞻題張競辰所居萬卷堂詩君家四壁如相如卷  
藏天祿如石渠豈惟鄴侯三萬軸家有世南行祕書

綠野

見致仕

碧瀾

堂在湖州子城東南霅溪之西唐刺史杜牧建牧有隸  
書碧瀾堂三大字宋陳堯佐詩茗溪清淺霅溪斜碧玉  
寒光照萬家誰向月明終夜聽洞庭漁笛隔蘆花

寫韻

堂在南昌府城南紫極宮唐太和末仙女吳綵鸞寫孫  
愐唐韻於此故名

讀書

張九齡讀書堂在南雄府始興縣南山幽水秀花木長  
春几案庭戶皆石琢就

絳雪

堂在荊州楚塞樓前宋知州朱慶基與客會飲紅梨花  
盛開命坐客賦詩歐陽公詩風輕絳雪樽前舞日煖繁  
香露下聞因以絳雪名其堂又黃州府治東有雪堂蘇  
軾謫居於黃以大雪中築堂及落成因繪雪於四壁故  
名

白雲

堂在福建長樂縣宋管師復詩入寺層層百級梯野堂  
更與白雲齊平觀碧落星辰近俯見紅塵世界低

居易草堂

白樂天元和中謫江州司馬因即廬山遺愛寺西鄭氏  
舊隱築草堂居之

魏野草堂

見隱士

畫錦

堂在彰德府治北宋韓琦以宰相判鄉郡建於居第歐陽脩記蔡襄書琦第別有榮歸虛心二堂其後曾孫侂胄為相又建榮事堂

寒碧

堂在黃州府東門外宋時何氏兄弟作此堂以待蘇軾之至為畫竹石及賦詩題於壁

醉白

河南彰德府治北有醉白堂韓琦建於居第池上取唐白樂天池上之詩以為醉白堂之歌蘇軾為記

景韓

唐韓愈嘗刺袁州宋紹興間郡守陳稀立景韓堂以寓景慕之意黃禴為記

三善

堂在餘干縣治西宋令沈度政有三善故云一曰田無廢土二曰市無閒居三曰獄無宿繫父老請以名堂



十箴

廣西平樂府有十箴堂宋周必大刻十箴於石

遂初

順天府南有遂初堂元詹事張九思別業也繞堂花竹  
水石之勝甲於都城九思嘗以休沐與公卿大夫觴咏  
於此從容論說古今以達於政理非真為游樂之地云  
逸老

見莊

三槐

開封府城仁和門外有三槐堂宋兵部侍郎王祐構居  
第時手植三槐於庭曰吾子孫必有為三公者後子旦  
果為相人遂號三槐王氏子孫因建三槐堂蘇軾為記

萬柳

順天府南有萬柳堂元庶希憲別墅也堂臨池池中多  
蓮繞池植柳風景可愛每招盧摯趙孟頫等游宴時有  
歌以小聖詞侑觴者孟頫賦詩萬柳堂前數畝池平鋪

雲錦蓋連漪主人自有滄洲趣游女仍歌白雪詞手把荷  
花來勸酒步隨芳草索題詩誰知咫尺京城外便有無  
窮萬里思

雙松

廣西全州治中有雙松堂黃山谷詩文殊堂下松永日  
如鳴琴我登雙松堂時步雙松陰中有寂莫人安禪無  
古今

八桂

堂在桂林府治宋守范成大建李彥弼為記又命名孔  
延世嘉祐間知封川遺愛在民三子文仲武仲平仲同  
讀書於郡齋後人榜曰三桂堂

五詠

桂林府獨秀山前有五詠堂取劉宋顏延之有五君詠  
故名宋守孫覽有記

四并

四并堂在揚州郡圃宋韓琦以資政殿學士知揚州時

建取美景良辰賞心樂事四者難并之義

棲賢

東坡志林云子由作棲賢堂記讀之便如在堂中見水石陰森草木膠輳也僕當為書之刻石堂上且欲與廬山結緣他日入山不為生客也

思聖

兗州府汶上縣有思聖堂元楊奐東遊記曰汶上古之中都先聖之舊治魯定公九年宰於此縣署之思聖堂

是也

冰玉

堂在南康府治後愛蓮堂之北宋郡人劉渙字凝之故居蘇軾嘗曰凝之父子廉潔不撓冰清而玉剛鄉人因以名堂朱元晦張文潛俱為作記按渙字名恕字道原

柱石

堂在漢中府園宋文同詩嘗聞陽朔山萬尺從地起孤峯立堂下此石無乃似為爾嘗獨來一日須三面

有美

宋嘉祐二年梅摯以龍圖閣直學士尚書吏部郎中出守於杭仁宗於其行也賜詩以寵之其首章云地有湖山美東南第一州因取有美二字以名堂歐陽脩作記

無訟

堂在袁州府治內宋建炎間郡守阮閱建并記

勉耘

堂在安福縣北六十里宋邑人彭奇宗建文天祥為之

說曰百聖在天六經行地譬之五穀皆美種也錢鏐必  
痔荼蓼必薈既堅既好實穎實粟不然略閩蜀之蹲鴟  
給燕趙之棗栗而吾未嘗不飽嗚呼此豈樂饑常法哉  
彭君奇宗之為學也知所以種而以勉耘顏其堂其必  
自五穀始是穰是藁必有豐年奇宗俟之

宅生

堂在肇慶府封川縣治北宋郭祥正詩水光送日浮珍  
席山勢和雲插畫梁安得身如張相國為君重賦宅生



章

中和

堂在杭州鳳皇山下宋孫沔守杭時建高宗登堂望會稽山詩曰六龍轉淮海萬騎臨吳津王者本無外駕言蘇遠民瞻彼草木秀感此瘡痍新登堂望稽山懷哉夏禹勤神功既盛大後世蒙其仁願同越勾踐焦思先吾身艱難務遵養聖賢有屈伸高風動君子屬意種蠡臣

光碧

光碧堂在崑崙山西王母所居

和青

堂在台州府治取杜甫雲水長和島嶼青之句為名

桂籍

宋太宗興國中進士中第賜題名於桂籍堂此題名之始唐人題名於慈恩寺乃進士自題也

蓮城

見處州府治南園宋乾道中范成大建

齋

說文齋潔也取其戒潔之義以為室也杜陽編梁武帝造佛寺令蕭子雲飛白大書一蕭字於內季約之見之破產買歸東洛建一小室玩之號蕭齋後世齋之名始此一說漢宣帝齋居決事此齋名之起也

王肅東齋

輿地志漢王朗為會稽太守子肅隨之郡住東齋內夜有女子從地出稱趙王女與肅語至曉別贈一丸墨肅

方欲注周易因此便覺才思開悟

蔡凝西齋

陳蔡凝字子居博涉經傳尤工草隸常端坐西齋日非  
名流罕與交接大建初除吏部侍郎

竹齋

唐張渭題從弟沔州判官竹齋詩竹裏藏公宇花間隱  
使車

茅齋

杜甫題已公上人茅齋詩已公茅屋下叮嚀賦新詩枕  
簟入林僻茶瓜留客遲江蓮搖白羽天棘蔓青絲空添  
許詢輩難酬支遁詞

藏法帖

宋米芾出守無為軍作寶晉齋藏晉人法帖又作寶月  
齋鑒墨池仰高堂明遠樓愛潤州京口溪山之勝遂家  
焉作庵城東號為海岳後潤州火惟存李衛公塔與此  
庵耳米詩云神護衛公塔天留米老庵

貯古文

歐陽脩東齋記河南主簿張應之素病羸然力自為學  
每體之不安則取六經百氏若古人述作之文章誦之  
愛其深博閱達雄富偉麗之說則必茫乎以思暢乎以  
平釋然不知疾之在體因多取古書文字貯之齋少休  
則探以覽焉夫世之善醫者必多畜金石百草之物以  
毒其疾湏其瞑眩而後瘳應之能安居是齋以養思慮  
又以聖人之道和平其心而忘厥疾真可謂藥喜者歟

長梁

齊特進光祿大夫王儉僧虔之兄子也作長梁齋制度  
小過僧虔不悅竟不入戶儉即日毀之

畫舫

歐陽脩畫舫齋記予至滑之三月即其署東偏之室治  
為燕私之居而名曰畫舫齋凡入於室者如入乎舟中  
其温室之奧則穴其上以為明其虛室之䟽以達則欄  
檻其兩傍以為坐立之倚凡偃休於吾齋者又如偃休

乎舟中山石嵒萃佳花美木之植列於兩岸之外又似  
汎乎中流而左山右林之相映皆可愛者故因以名舟  
焉

無倦

齋在靜江府經略使所治廳事之西宋張南軒云舊名  
緩帶予懼其肆也更題曰無倦

無邪

蘇東坡故居在惠州府歸善縣治北軾以元祐黨貶此



所築堂曰德有鄰齋曰思無邪後人塑東坡土像於中以祀之

南州

晉桓溫初於南州起齋齋中悉畫盤龍因號盤龍齋及桓玄篡位劉毅討之玄死於齋而毅居之毅小字盤龍東府

梁宣城王為揚州刺史顧野王及王褒為賓客野王好丹青王於東府起齋舍野王畫七賢於中命王褒書時

稱為兩絕

少陵居夔

陸游高齋記杜少陵居夔三徙居皆名高齋其曰次水門者白帝城之高齋也曰依藥餌者漢西之高齋也曰見一川者東屯之高齋也

安定教湖

宋胡定先生教學於蘇湖間二十餘年束脩弟子以千計時方尚詞賦獨胡學有經義治事齋經義齋者擇疏

通有器局者居之治事齋者人各治一事又兼一事如  
邊防水利之類故天下謂胡學多秀彥其出而筮仕往  
往取高第及為政多適於世用若老於吏事者由講習  
有素也

### 高齋

齋在杭州府舊治上據城闌下瞰虛白堂超出州宅及  
園圃之中故謂之高齋唐嚴維詩詩家九日憐芳菊遷  
客高齋對浙江漁浦浪花搖素壁西陵樹色入秋牕又

衢州府西安縣北亦有高齋宋趙抃歸老所作見致仕

敬齋

見箴

德秀新居

宋真德秀越山新居成名其齋曰學易春帖云坐看吳  
越兩山色默契羲文千古心

孟頫別第

湖州府城內甘棠橋西有松雪齋乃元趙孟頫之別第

也

觀善

崇安武夷山有峰夷下銳上號大隱屏朱熹築室其下有仁智堂隱求齋觀善齋止宿寮石門塢寒棲館晚對亭晦庵釣磯茶竈韓元吉有記

凝香

濟南府布政司治內凝香齋舊名西齋宋曾鞏取唐韋應物燕寢凝清香之句改今名

四益

齋在袁州郡治宋太守張杓建刻其父魏公所書四益碑於其中故因以名齋又高郵趙晦之作四達齋

六有

宋尹焞字彥明晚歲手書聖賢所言治心養氣之要粘之屋壁以自警一室名六有齋取張橫渠言有教動有法畫有為宵有得瞬有養息有存之意一室名三畏堂

怡齋

宋馬子遂良為齋以怡命名洪景盧記曰自子之去親戚遠墳墓行游四方有年矣僅歲時歸休覲父母再拜墓祭罷入室則刺刺與子語勞苦平生百未一厭復別去且為超然無一分樂易色行年三十七挂腹五千卷書未能合有司度程掇取一第耻耻棲棲不自聊賴顧方以怡自滿傲視容膝之室得微太欺我歟遂良且笑且怒曰子貌則士也夫何言之陋方吾家居入怡顏以事父母出怡色以與兄弟處暇時讀書以怡吾心食與

口怡寢與體怡吾窮到骨矣而其怡常自在也旦吾遊越則越為吾廬暮吾遊燕則燕為吾廬在吾室為吾齋固也出而見子坐子之舍亦吾齋也孰賓孰主哉

拙齋

盱江曾節夫以拙名其齋張南軒為之記曰稽諸洙泗之門子之家子與非百世之師乎聖人始以魯稱之而其於是道終以魯得之所謂三省其身自反而縮與夫動容貌正顏色出辭氣皆平日之所為用力者也戰兢



臨履至於啓手足之際而後以為知免其學之有始有卒幾於聖人而全其天蓋如此子請無他求以子之家子與為標準而從事焉其可若夫安其所已能而倦其所未進是拙之流生害也吾子必不然矣

### 浩齋

宋馬存字子才為于越許淳翁作浩齋記云子請以一齋之事言之則所謂浩然者可以立見而不惑今子之整齊圖書拂拭几案卧琴於牀挂劍於壁冠珮在上履

杖在下異時之輔相天子措置公卿大夫百執事下至於庶人微至於萬物有異於此乎子有後而呼童子小不如意則必叱而去之奔走顛倒唯子所指異時將百萬之騎大戰於陰山之墟朔野之北使熊羆豺虎之猛將畢力赴敵萬死而不顧亦有異於此乎子或志倦體疲神倦欠伸撫髀露腹便便然酣卧於一榻之上異日之厭功名辭富貴歸休乎江湖之間泉石之畔高尚以養德醉吟而適真亦有異於此乎子之居是齋也試以

此觀之則所謂浩然者豈不壯哉

潛齋

宋晁補之字無咎作潛齋記客有過予者曰吾子生二十長六尺出不能提桴鼓以動百萬之師左烏號之弓右昆吾之劍喑鳴咤叱北牧祁連西虜靈夏入不能陪黃門之末議聯紫微之末班正容端色以齊肅百吏操紙握管以號令四海今反幽幽默默逃形遠迹以頑處心以潛名室豈非所謂倒行而逆施者耶予憮然而笑

曰有是哉請為客言潛易曰雷在地中復此天地之潛也而陽氣已動於黃泉矣尺蠖之屈以求伸也龍蛇之蟄以存身也此鱗蟲之潛也而小者獲伸大者獲存矣故不能靜者不能動不能處者不能出然則奚行之倒而施之逆耶昔者回憲潛於道故闇然而日彰黃綺潛於聲故默然而寢揚潛乎潛將為不潛者矣客俛而出因記其語於壁

進學

宋張文潛記元豐乙丑余官於咸平即其所居之西治其舊而完之既潔以新矣於是悉取詩書古史陳於其中有誦習之牖有休偃之席暑則啓扉寒則塞向朝夕處乎其中取書而讀之名曰進學齋而書其說庶朝夕得以自警焉

樂全

齋在嘉興縣治東北宋皇祐中主簿王存建自為記

軒

軒取軒豁之義

惜竹

見湖

聽松

軒在桂林府興安縣城中

高明

軒在漳州府普利寺蓋周上人軒也宋郭祥正詩周也漳南釋開軒瞰漳濱山光并水色一物長清新

安適

軒在長樂縣東南行林寺宋唐最詩卧聽觀音坐看山  
松蘿淨處閉禪關都將物外紅塵隔占得壺中白日閒  
待月

軒在瑞州府行春門外大愚山宋蘇轍謫筠州舟過南  
康廬阜訪隱者舉日月以喻性理因悟其說至筠作待  
月軒以自省并記其事

聽雪

松江府龍門寺有聽雪軒元楊維禎詩老夫聽雪龍門  
寺浙瀝霰鳴飄雪多龍噴雨花天作瑞象占雲葉氣生  
和月明蟹過銀沙岸風細魚沉玉海波萬籟一空天地  
老誰憐聲色墮婆娑

滴翠

軒在蕪湖縣廣齋院舊名檜軒黃庭堅嘗讀書其間郭  
祥正詩青幢碧蓋儼天成濕翠濛濛滴畫楹禪客自培  
千歲老遊人時把一樽傾



叢碧

軒在寧波府後宋時建米芾書扁軒之前有平易進思  
二堂

瑞露

軒在南安府南康縣治宋令陳廷傑有善政甘露降於  
古松因以名軒

宿雲

軒在廬州府巢縣金城寺宋王之道詩雲來不吾拒雲

去不吾追又惠州府冲虛觀有綵雲軒唐天寶間因麻姑仙立

荔枝

軒在閩縣南玉泉寺宋楊肱詩曾觀荔枝圖幾廢丹青粧能紅能紫亦能綠不能寫得天然香

茉莉

瓊州府臨高縣治東有茉莉軒胡銓有詩

高士

軒在同安縣簿廳西北隅朱熹為簿時建自為記

此君

軒在嘉定州榮縣後山上有黃庭堅詩刻又杭州於潛縣寂照寺有綠筠軒後亦更為此君軒蘇軾詩可使食無肉不可居無竹無肉令人瘦無竹令人俗人瘦尚可肥士俗不可醫傍人笑此言似高還似癡若對此君還大嚼世間那有揚州鶴

遺直

軒在雷州西湖近蘇公樓元辛鈞詩一家兄弟兩詩仙  
同在蠻邦豈偶然今日開軒見遺像當時美政亦相聯  
清節

軒在嘉興府海鹽縣治內宋紹興初李益為相因名此  
軒李正民詩新種脩篁翠葉稠凜然清節坐驚秋官曹  
正類崔斯立風味仍同王子猷

味諫

軒在叙州府治北宋岳珂程史云戎州有蔡次律者家

於近郭黃庭堅嘗過之延飲小軒檻外植餘甘子數株  
因乞名題曰味諫軒後王子予以橄欖遺之庭堅詩曰  
方懷味諫堂中果忽見金盤橄欖來想共餘甘有瓜葛  
苦中真味晚方回

也足

也足軒黃山谷題覺範道人軒也取兩三竿也足之義

瑞榴

邵武縣學內有瑞榴軒宋時有石榴樹士人觀其結實

之數以為登科之驗熙寧間結實頗大是歲葉祖洽上官均中在一二名祖洽詩已分桂葉爭雲路不負榴花結露枝

幽蘭

軒在汝寧府治內金義宗自歸德奔汝寧以府治為行宮宋端平初襄陽帥孟珙攻城甚急義宗自盡於此軒

會文

軒在邵武府學東廡之後

帶經

宋楊誠齋帶經軒記楊子將闢軒於南溪之北涯其地甚肥而美可為畦以蔬而朝夕挾書於斯一日與客觀之且誇其地客曰美則美矣然今之人目辯紅紫者其心不能應答問之是非手捉方圓者其耳不能聽英莖之節奏子於此乎書則蕪子之蔬子於此乎蔬則蕪子之書又焉在乎帶經而鋤余曰不然書者吾事蔬者所以寓吾意也故說者謂君子不當忘乎意況畦而列之

橫斜有徑高卑有陳則君子宫庭壇宇也種植有時采  
掇有方芬馨辛酸有類有族則君子之陳立經紀也灌  
之溉之由是得涵養之術鋤之擾之由是得脩慝之理  
如是則荷鋤而趨趨不害其為書帶經而聶孺不害其  
為蔬吾豈若樊遲哉規規然專務為老圃之事而董仲  
舒又為不窺之勤彼二子者所謂楚失而齊亦未為得  
也

門



釋名門捫也言在外為人捫摸也說文門從二戶象形也

閏月居

周官春官太史閏月詔王居門終月

孟秋祀

禮月令孟秋之月其祀門祭先肝

仰轅

周禮天官掌舍掌王之會同之舍設桎板再重設車宮

轅門注云環車以外向仰轅以為門

析羽

劉宋何尚之奏曰王有九旗析羽為門謂之旌門猶設車為門謂之轅門也

萬春千秋

洛陽有萬春門千秋門

雲龍風虎

酈道元水經神獸門東對雲龍風虎之門蓋衡楸之上

皆刻雲龍風虎之狀也

清明

水經咸陽宮東出北頭第二門名清明門

閭闔

水經閭闔門乃漢之西上門後魏溫子升閭闔門上梁  
文云惟王建國配彼太微大君有命高門啓扉良辰是  
簡枚卜無違彫梁乃架綺翼斯飛八龍杳杳九重巍巍  
宸居納祐就日垂衣一人有慶四海爰歸又蘇州府城

西郭門曰閶闔門夫差所作以天門通閶闔故名東城門曰胥門伍子胥以諫死令抉其目懸北門以觀越兵之入故名丘門以有干將墓在也本名將門後訛為匠門盤門古作蟠以吳嘗刻木為蟠桃象以厭勝越故名齊門吳為太子聘齊女女思齊而病闔閭乃起望齊門令女遊其上故名

銅龍

見太子

金馬

見宮又順天府舊燕城東南隅有銅馬門即古薊州城門城有十門此其一也昔燕慕容雋得奇馬鑄銅像置之東掖後人因以名門

定鼎

古今地名河南有定鼎門

望鐘

河南有望鐘門

可張雀羅

漢翟方進罷廷尉賓客皆去門可張雀羅

當容馬車

晉陳頤父訢立宅起門頤曰當使容馬車訢笑從之後  
郡辟頤為部從事乘馬車還家宗黨榮之仕至梁州刺  
史

濯龍

東漢建初二年有司依舊典乞封諸舅馬太后詔曰前

過濯龍門上見外家車如流水馬如游龍吾亦不譴怒  
之但絕其歲用冀彼默止

飛兔

洛陽故宮有飛兔門

西暑

淮南子曰東北方曰土山曰蒼門東南方曰波母之山  
曰陽門南方曰南極之山曰西暑門

東陽

晉宮闕名洛陽城東門曰東陽門

聽政

劉澄之山川古今記魏武聽政殿前有聽政門

含章

洛陽有含章門建禮門卻非門會福門

院

養鹿

南康五老峰下白鹿洞中有白鹿書院唐李渤兄弟隱



此養一白鹿因以名洞院南唐昇元中建學館以李道  
為洞主掌教授

蓄鵞

鵞湖書院在鉛山縣西南十五里昔有龔氏居山傍蓄  
鵞成羣因名宋淳熙中朱晦庵陸象山曾會此論辯所  
謂鵞湖論辯即此

脩書

通鑑唐玄宗紀上置麗正書院聚文學之士秘書監徐

堅太常博士會稽賀知章監察御史趙冬曦等或脩書  
或侍講命張說為脩書使以總之有司供給優厚

肄業

張南軒記湘西故有藏室背陵向壑木茂而泉潔為士  
子肄業之地開寶中郡守朱洞度基創宇以待四方學  
者李允則為州請於朝乞以書藏之是時山長周式以  
行義稱祥符八年召見便殿拜國子主簿使歸教授詔  
名嶽麓書院兼賜中秘書紹興辛亥更兵火煨燼乾道

改元建安劉珙下車湘人合辭以書院請未半歲而工告成焉

賜額

唐元和間衡州人李寬於石鼓創書院宋國初賜額朱文公為記

賜名

應天府書院初府民曹誠即同文舊居廣舍五十楹聚書千餘卷宋真宗嘉之賜今名

西澗

在瑞州府治西鳳皇山右宋劉渙號西澗家高安渙子  
恕恕子義仲三世一節人稱三劉端平初知州張覲創  
書院立祠祀渙因名西澗

東湖

東湖書院在隆興府漕臣趙宗憲創滕強恕以逼近市  
廛請於朝遷之東湖晏家山上

淨行

淨行院在廉州興廉村蘇軾南謫時宿此有荒涼海南境佛宇如雞棲之句

興道

興道院在徽州問政山唐時聶道士脩真之所宋紹興間詔以御書黃庭內景經及臨古法十卷賜之

樂善

樂善書院在瑞州府治南瑞陽門外宋郡守王淹以郡中姓宋者實繁乃創書院及置田以教育宗子之孤幼

者

明心

明心院在吉安府城南宋仁宗御書大雄寶殿四字

尼山

山東鄒城縣有尼山書院宋慶厯中建在尼山上

石井

石井書院在晉江縣西南石井鎮舊名鰲頭精舍宋紹興初朱松嘗為鎮於此有教養及民後子熹來官同安

至鎮訪父時事講訓益勤嘉定中鎮官游絳立為書院  
繪二先生像而祀焉

同文

同文書院在建寧府建陽縣崇化里書坊朱熹建

廣教

沔陽州覆金洲上有廣教院唐陸羽故居

槐堂

槐堂書院在撫州府金谿縣學東宋令陳詠之建以陸

子靜家塾之名因扁曰槐堂

花林

花林院在南雄府城東元劉淵詩花落春已暮門開白  
雲來階前一片石風雨留莓苔

洙泗

洙泗書院在曲阜縣西北即孔子講道之所

絃歌

絃歌書院在武城縣南舊在縣西四十里元泰定中徙



之學士承旨劉賡扁名學士張起巖撰記其子游仕魯  
治在今兗州府費縣西北此以其邑名相同故立書院  
祀之

### 武夷

武夷書院在崇安縣武夷山朱熹初建精舍於此景定  
中朝命建書院又設山長焉

### 文定

文定書院在崇安縣西元縣尹彭廷堅建祀宋儒胡安

國以其子寅寧宏及從子憲配享焉

考亭

考亭書院在建陽縣西三桂里唐御史黃端構亭以祀其先因名朱熹晚年築室居此理宗詔立書院親書扁額賜之

潁谷

潁谷書院在河南登封縣西南宋崇寧中建并立廟以祀宣聖

濂溪

濂溪書院在廬山之麓宋周敦頤建後守潘慈明增築  
朱熹為記

清湘

清湘書院宋林岳守全州得柳侯仲塗讀書遺址築室  
館士令守趙必愿增廣之魏了翁作記

慈湖

慈湖書院在饒州府樂平縣東南宋楊簡為令以禮讓

金定四年  
卷一百七十三  
變俗時號慈湖先生簡沒民思之不忘因立書院

文溪

文溪書院在瑞州府城南文溪之上宋陳仲微建為讀書之所又荊州府澧州治南有文山書院唐李羣玉讀書之所文山羣玉字也

涑水

汝寧府光山縣治西有涑水書院涑水先生司馬光號也光父池為光山令生光於此後人構書堂祠光因以

名涑水

鄱江

鄱江書院在饒州府城北宋朱熹門人金去偽講學之所

山堂肆考卷一百七十三

欽定四庫全書

山堂肆考卷一百七十四

明 彭大翼 撰

宮室

僧寺

事物紀原漢明帝時攝摩騰竺法蘭始自西域以白馬馱經來初止鴻臚寺遂取此寺名初白馬寺此寺之始也

白馬

通鑑梁紀天竺國有伽藍名招提其處大富有惡國三利其財將毀之有一白馬繞塔悲鳴即停毀自後改招提為白馬

烏龍

寺在衡州沅江縣西內有龍墨池

雲門

雲門寺在紹興府城南雲門山晉王獻之居此嘗有五色祥雲故詔建寺號雲門杜甫詩若耶溪雲門寺青鞋



布襪從此始

雪竇

奉化縣西北雪竇山中有雪竇寺唐時建宋淳祐中賜御書應夢名山四大字

淨覺

寺在瑞州府新昌縣西劉宋武帝建唐柳公權書額

真空

寺在台州府西南舊

闕

宋李輔詩括蒼山上雲山

好雲亦好可憐山下僧看雲不知老

金山

寺在潤州金山上唐有頭陀斷手以建伽藍忽一日江  
邊獲金數鎰表聞因賜名金山寺唐張祜詩一宿金山  
寺微茫水國分僧歸夜船月龍出曉堂雲樹影中流見  
鐘聲兩岸聞因悲在朝市終日醉醺醺又湖廣武昌府  
興國州北有銀山寺蘇軾與李仲覽過此書鐵壁二字  
世傳以為銀山鐵壁

# 鐵塔

寺在應天府西北岡上劉宋時建前有二鐵塔因名又揚州城內有石塔寺舊名木蘭院即唐王播題詩處宋改院曰石塔寺

## 甘露

寺在潤州北固山上吳甘露中建因名內有梁武帝所書天下第一江山六字及所鑄大鐵鑊二可容百斛畫獅子一菩薩二皆陸探微筆又有石如羊謂之狼石相

傳孔明孫仲謀論曹公坐石也李衛公德裕所建祠堂  
有手植桂合抱宋沈存中詩丞相高齋半草萊舊時風  
月滿亭臺地從日月生時見天到江山盡處回三國是  
非春夢斷六朝城闕野花開心隨流水漫漫去流徧烟  
村半日來

慈雲

寺在金壇縣治之東黃山谷詩城東寶坊金碧重道人  
脩惠剪蒿蓬一瓶一鉢三十年瓊櫺碧瓦上秋空稻田

募衲擁黃髮更築書閣諸天中三后在天遺聖墨百神  
受職扶琳宮文思帝澤餘溫潤雨露下國常年豐貢川  
章川結襟帶梅嶺桂嶺來朝宗參旗斗柄略欄楯清坐  
耳聞河漢風道人飽參口掛壁頗喜作詩如已公家風  
秀句刻琬琰邀我落筆何能工安得雄文壓聖境九原  
喚起杜陵翁

虎丘

寺在蘇州虎丘山晉司徒王珣與弟珣捨宅為之其寺

有生公講堂劉禹錫虎丘西寺詩吳王冠劍作塵埃  
地翻為七寶臺石砌百尋光似鏡井輪千轉響成雷  
昔年棣萼聯枝發今日蓮宮並蒂開更有女郎墳在  
此時雲雨試僧來

鶴林

寺在潤州黃鶴山上舊名竹林寺劉宋高祖微時常  
獨卧講堂上有五色龍章及登極改今名唐李涉題  
寺中僧室詩終日昏昏醉夢間忽聞春盡強登山因  
過竹院

逢僧話偷得浮生半日閒

棲霞

寺在金陵攝山上齊時建中有隋文帝藏舍利塔後有  
天開巖

落星

黃山谷詩落星開士深結屋龍閣老翁來賦詩小雨藏  
山客坐久長江接天帆到遲宴寢清香與世隔畫圖妙  
絕無人知蜂房各自開戶牖處處煮茶藤一枝按南康

府彭蠡湖西北有落星湖湖有小山相傳星墜水所化  
又陳王僧辯破侯景於落星灣及宋孟太后過落星寺  
舟覆宮人溺死者十數惟太后舟無虞皆此處也

長干

寺在金陵聚寶門外吳赤烏間有康居國異僧領徒至  
長干里結茅行道能致如來舍利孫權為建塔奉焉名  
寺曰建初實江南塔寺之始梁名長干寺宋改名天禧  
及明朝永樂初徹其舊而斥大之賜名大報恩寺按聚



寶門外地名有大長干小長干寺在其中也江東人謂山隴之間曰干

大果

寺在南康府建昌縣治東唐大厯間建因寺有梨樹結實大如斗故名

慈恩

慈恩寺在西安府城南曲江池側本隋無陋寺之地唐武德初廢貞觀三十年高宗在春宮為其母文德皇后

祈福即其地建寺故名慈恩南院臨黃蘗竹木森邃為  
京城之最西院浮圖六級高三百尺永徽三年沙門玄  
奘立浮圖內有梵本諸經數十匣浮圖前東階立太宗  
皇帝三藏聖教叙及高宗皇帝述聖記二碑并褚遂良  
書

祥符

寺在南康縣治東北宋時建邑人鍾福肄業於此手植  
小松一夕夢朱衣玄冠者告曰松圍三尺子當策名後

三十始登科南歸視松果如所夢

兩塔

譬喻經罽賓國有兩塔寺

五臺

大理府點蒼山十四峰之半有鶴雲寺其北有石雲寺  
又十五峰下有盤龍聖元五臺三寺

衡嶽

寺在衡山縣集賢峰唐韓愈宿此有題門樓詩

湘宮

劉宋虞愿為散騎常侍明帝起湘宮寺費極奢侈又起莊嚴刹十層不可立分為兩刹各五層帝曰卿至湘宮寺未我起此寺是大功德愿曰陛下起此寺皆是百姓賣兒販婦錢所為佛若有知當慈悲哀愍罪高浮圖何功德之有帝怒使人馳曳下殿

戒珠

越州戒珠寺即王羲之宅也有洗硯池水常黑色

法石

寺在晉江縣東南宋時建

香山

寺在河南府城西南龍門唐白居易記龍門十寺遊觀之盛香山為冠

醴泉

寺在濟南鄒平縣黌堂山下宋范仲淹讀書時嘗見窖銀覆之不取後僧求修寺資公使發銀適周於用

葆光

寺在湯陰縣西唐天寶中建本晉孫登學道之所有嘯  
臺及煉丹井白雲洞存焉

章敬

唐代宗朝魚朝恩以賜莊為章敬寺以資冥福窮極壯  
麗奏毀曲江院及華清宮館以給之

寒山

寺在蘇州城西十里楓橋之傍唐張繼有楓橋夜泊詩

月落烏啼霜滿天江楓漁火對愁眠姑蘇城外寒山寺  
夜半鐘聲到客船又宋孫觀詩白首重來一夢中青山  
不改舊時容烏啼月落橋邊寺歌枕猶聞半夜鐘又武  
昌有寒溪寺初陶侃刺廣州有漁者得金文殊像於海  
上乃阿育王所造也侃送諸武昌寒溪寺及侃督江州  
使迎像來江州積十力不能動比入舟舟輒沒遂已其  
後東林寺成慧遠默顙之像冷然自至慧遠為建閣以  
事之

冰井

寺在梧州府東門外半里許以寺傍有冰井因以名寺

清源

寺在西安府藍田縣輞谷本唐王維山居捨為寺也

靈谷

寺在金陵鍾山之東南晉時建宋改太平興國寺中有

寶誌公塔

劍水



唐李紳詩劍水寺前芳草合鏡湖亭上野花開

鼓山

宋趙汝愚詩幾年奔走厭塵埃此日登臨亦快哉江月  
不隨流水去天風常送海濤來朱文公摘詩中天風海  
濤字題扁巖次山有水龍吟題於壁

東林

廬山疏東林寺者晉沙門慧遠之道場也初慧遠自樓  
煩至廬山結庵以居曰龍泉精舍其後刺史桓伊為之

請立寺曰東林而名其殿曰神運又有西林寺在東林之西故沙門竺曇之禪室也竺死其徒慧永自太行至潯陽因就居之太府卿潯陽陶範為之立寺曰西林而永又別立庵於寺後山上名伏虎庵而庵又常香故名谷曰香谷泉曰香谷泉事見歐陽詢西林寺碑

西丘

白居易夜遊寺詩不厭西丘寺閒來即一過州船轉雲島樓閣出煙蘿路入青松影門臨白月波魚跳驚秉燭

猿覩怪鳴珂搖曳雙鴻影娉婷十翠娥香花助羅綺鐘  
梵雜笙歌領郡時將久遊山數幾何一年十二度非少  
亦非多

孤山

寺在杭州西湖孤山上唐張祜詩樓臺聳碧岑一徑入  
波心不雨山常潤無雲水自陰斷橋荒蘚合空苑落花  
深猶憶西牕夜鐘聲在北林

少林

寺在河南登封縣少室山北麓後魏建梁時達摩居此  
面壁九年唐宋以來多名賢題詠

安國

唐憲宗元和中吐突承璀領功德使盛脩安國寺奏立  
聖德碑先構樓請學士撰文欲以萬緡酬之上命李絳  
為之絳言堯舜禹湯未嘗立碑自言聖德惟秦始皇刻  
石高自稱述未審陛下欲何所法且叙脩寺之美豈所  
以光聖德耶上命曳倒碑樓承璀言樓大不可曳上厲

聲曰多用牛曳之承璫不敢言乃用百牛曳之遂倒

開先

寺在廬山下梁昭明太子棲隱之地

石鏡

唐盧照鄰詩古墓芙蓉塔神銘松栢煙鸞沉仙鏡底花  
沒梵輪前

玉局

寺在大理府點蒼山六峰之半蒙氏建中有唐御史杜

光庭祠元李伯強詩海風吹曉上層臺玉局仙人安在  
哉一帶山河無限好百年懷抱此時開

歸宗

寺在廬山金輪之南晉王羲之故宅也初羲之守九江  
時西域僧佛馱耶舍來廬山羲之雅重其說因捨宅為  
寺以居之

薦福

見貧人

# 招隱

江淮肥遯陳景沂書曰戴顓字仲居捨宅為招隱寺在  
京口放鶴門外與鶴林古竹院相望數里孤處於萬山  
荒涼之巔所由山逕石卵累之不絕如綫有宋米元章  
隸碑以紀仲居之出處方丈有閣號增華梁昭明太子  
選文於中閣之左有亭名虎距鹿跑甘泉清泚閣之右  
有亭名玉葢亭之下有玉葢二株對峙一架其株條彷彿  
乎葡萄而非葡萄之可比輪囷磊塊有古君子氣象

馬

悟真

藍田玉潤山有悟真寺高僧於此寫涅槃經羣鴿自空中飛來銜水添硯

遺愛

白樂天草堂記匡廬奇秀甲天下山北峰曰香爐峰北寺曰遺愛寺介峰寺間其境絕勝又甲廬山元和十一年秋太原人白樂天見而愛之若遠行客過故鄉戀戀



不能去因面峰腋寺作為草堂

旌忠

寺在茶陵州治西宋時建堊戰沒之士於此因名

雨花

雜俎大同坊雲花寺唐大歷初僧儼講經天雨花至地  
咫尺而滅夜有光燭室因勅改寺名曰雨花

落桂

杭州城西有下中上三天竺等下天竺晉咸和中僧慧

理建中天竺隋開皇十七年僧寶掌建上天竺晉天福  
中建三竺之勝周圍數十里而前後有飛來蓮花月桂  
諸峰唐天聖中八月十五夜朗有靈實降於月桂峰狀  
如珠璣璀璨奪目有異人識之曰此月中桂子也遂以  
名峰白居易天竺寺詩一山門作兩山門兩寺元從一  
寺分西澗水流東澗水南山雲引北山雲前臺花發後  
臺見上界鐘聲下界聞遙想吾師行道處仙花桂子落  
紛紛

乾明

寺在漢中府中梁山劍外叢林惟牛頭與此為勝

國清

寺在台州府天台縣北十里舊名天台後名國清隋煬  
帝為智顗禪師建唐僧一行禪師嘗於此學筭杜荀鶴  
詩一到天台寺高低景旋生共僧巖上坐見客海邊行  
野色人耕破山根浪打驚忙時向閒處不覺有閒情宋  
晏殊類要齊州靈巖荊州玉泉潤州棲霞台州國清世

稱四絕

梁武捨身

同泰寺在金陵臺城內梁武捨身於此

番僧持像

金花寺在成都府西南即司馬相如故宅劉宋時有番僧持金花王像至此因名又龍馬寺在平涼府涇州長武鎮宋太祖微時嘗過此寺僧守嚴者異其骨陰使畫工圖於寺壁

鳥雀不污

酉陽雜俎都下佛寺神像往往有鳥雀不污者鳳翔山人張盈言或有佛寺金剛鳥雀不集者非其靈驗也蓋由取土處及塑像時偶與辰王相相符也

鴝鵒不入

見壁

玄奘譯經

玉華寺在延安府宜君縣西即唐玉華宮也高宗時廢

為寺玄奘法師於此譯經

真如會法

兜率寺在四川潼川州南二里中有劉文虺塚杜甫詩  
兜率知名寺真如會法堂江山有巴蜀棟宇自齊梁庾  
信哀須久何顯好不忘白牛車遠近且欲上慈航

金地

經符異相佛大檀越須達多長者居舍衛國常施孤獨  
故曰給孤獨因往王舍城護彌長者家為男求聘因見

其家請說佛法遂生歡喜心接足作禮而白佛言我舍  
衛國人多信邪弟子欲營精舍請佛住化佛默受請即  
遺舍利弗指授規則徧處求踏唯有祇陀太子一園廣  
八十頃林木鬱茂幽靜可居既得勝地往白太子太子  
戲曰滿以金布地便當相與須達多長者出金布地八  
十頃精舍告成凡千二百處白王遣使請佛安居

珠林

佛經黃金七寶為地摩尼珠為林

鴈堂

釋氏要覽毗舍離于大林為佛作堂形如鴈字一切具足因名鴈堂又西域記昔有比丘見羣鴈飛翔忽有一鴈落下自殞衆曰此鴈垂戒宜旌彼德於是瘞鴈建塔遂名鴈塔

牛洞

同安志舒州皖公山乃三祖璨大師道場即山谷寺也旁有石牛洞



龍井

國一大師因獵者導自徑山重岡之西至於危峰之北  
有素衣老人前而致拜請師登山絕頂入五峰之間曰  
願捨此地為師立錫之所因指大湫謂師曰吾家若去  
此湫當涸留一水穴幸勿墟之我將時至而衛師言訖  
雲霧晦冥風雨驟作及明既霽湫水盡涸惟一穴尚存  
謂之龍井

雞園

無憂王造小乘大衆出家寺在摩竭陀園佛滅後衆名  
德比丘皆住雞園

猴池

佛國有五精舍一給孤園二靈鷲山三獼猴池四菴羅  
樹五竹林園又王勃寺碑云高臺與鴈塔俱平曲峰與  
猴池共盡

鷲峰

六帖精舍梵宮寶地化城淨土鷲峰紺園紺宇皆佛寺

名

柰林

白馬寺有柰林故寺稱柰園

蓮社

廬山記劉宋謝靈運一見遠公肅然心服乃即寺翻涅槃經因鑿池植白蓮於中名臺曰翻經臺因號曰白蓮社

珍樓寶屋

唐高力士於來廷坊建佛寺珍樓寶屋竭盡國貨

廣殿長廊

唐韋蟾道林寺詩石門迴接蒼梧野愁色陰深二妃寡  
廣殿崔嵬萬壑間長廊詰曲千巖下靜聽林飛念佛鳥  
細看壁畫馱經馬暖日斜明蟬蛩梁濕煙散幕鴛鴦瓦

道觀

釋名觀樓也於上觀望也今道家亦謂之觀又謂之  
宮多為祠官典領之地

問道宮

宮在平涼府崆峒山下相傳軒轅黃帝問道之所

蕃釐觀

觀在揚州府城東門外即古土地廟又名唐昌觀中有  
無雙亭即今瓊花觀是也

昇真洞

武夷山第十六昇真元化洞天昔有神仙降此曰武夷  
君統錄地仙授館於此俗傳玉帝與太姥魏真人武夷

君建幔亭綵屋數百間宴鄉人男女千餘於其上皆呼  
為曾孫石壁上有室曰昇真洞洞上有神仙蛻骨莫計  
其數室前有黃心木棧又有四木船兩兩相覆亦盛仙  
人骸骨半枕室棧不墜不壞其下曰沖祐觀遊仙者多  
自此買舟泝流而上觀之

延真觀

觀在南康府北唐李林甫女騰空所居李白詩羨君相  
門女學道愛神仙一往屏風疊乘鸞著一鞭

紫極宮

唐李白潯陽紫極宮感秋之作何處聞秋聲  
脩脩北牕竹迴薄萬古心攬之不盈掬  
靜坐觀衆妙浩然媚幽獨白雲南山來  
就我簷下宿嬾從唐生決羞訪季主  
卜四十九年非一往不可復野情轉瀟散  
世道有翻覆陶令歸去來田家酒應熟

玄都觀

觀在西安府城內崇業坊唐貞元二十一年  
劉禹錫以

屯田員外郎出牧連州貶朗州司馬居十一年召還京

師過玄都觀見道士植桃其盛若霞作戲贈看花諸君  
子詩紫陌紅塵拂面來無人不道看花回玄都觀裏桃  
千樹盡是劉郎去後栽未幾又被讒出牧居十四年復  
入為主客郎中重遊此觀蕩然無復一株惟兔葵燕麥  
動搖春風耳復作遊玄都觀詩百畝庭中半是苔桃花  
淨盡菜花開種桃道士歸何處前度劉郎今又來時太  
和二年三月也



青羊宮

宮在成都府西昔老子別關令尹喜曰後尋我於成都  
青羊之肆即此

白鶴觀

觀在岳州石門縣西北宋時建元何有成詩曾有仙人  
雙白鶴可無老子一青牛

陳搏居

神仙傳陳搏亳州真源人始隱武當山後居華山雲臺

觀唐孟郊有遊雲臺觀詩

蔡經宅

建昌府麻姑山高九里山門榜曰丹霞小有洞天其下有水簾巖遠峰秀出如畫自是而入地勢寬平路之東南隅則碧蓮池坦途一望間即仙都觀也乃蔡經宅麻姑王方平所會之所

玉局觀

見道士

金庭宮

唐崔尚書碑天台山高一萬八千丈周圍八百里其山八重四面如一中有洞天號金庭宮即王子晉脩道之處唐時司馬鍊師承禎居焉賜名崇道觀

千秋觀

鑑湖在紹興府城南東西二十里南北數里縈郊帶廓連屬峰岫白水翠巖互相映發若鑑若圖故謂之鑑湖賀知章入道賜鑑湖一曲後捨所居宅為觀始名千秋

後賜名千秋鴻禧觀在湖上

萬壽宮

晉太康中許旌陽於洪州西山舉家四十二口俱上昇  
初旌陽學道於丹陽黃堂嘗以五色錦帷飛還故宅鄉  
人立為還帷觀祥符改賜玉隆萬壽宮額

五洞九峰

洞霄宮在杭州太滌山漢武帝元封間開創宋祥符中  
改今名宮有五洞交扃九峰回抱蘇軾詩上帝高居懸

世頑故留瓊館在凡間青山九鎖不可到作者七人相  
對閒亭下流泉翠蛟舞洞霄飛鼠白鴉翻長松怪石宜  
霜鬢不用金丹苦駐顏

鶴壇龍壁

趙師秀桐栢觀詩石壇遺鶴羽粉壁剝龍形

紫臺

陳陰鏗遊始興道館詩紫臺高不極青溪千仞餘壇邊  
逢藥鉞洞裏閱仙書庭舞經行鶴池遊被控魚稍昏薤

葉歛欲暝槿花疎徒教斧柯爛會自不凌虛

碧洞

丹臺碧洞出道德經

福區

唐王嶼建言唐家宜崇表福區招致神靈

靈境

唐崔尚書桐栢觀頌不死之福鄉養真之靈境

琳館

歐陽公集珠庭琳館

瑤壇

唐文粹金榜瑤壇


澹泊居

張少愚道觀詩獨宿澹泊境杳然心事空

簡寂居

東坡道觀詩山行漸覺鳥聲殊漸近神仙簡寂居門外  
長溪容淨足山腰苦筍耿盤蔬喬松定有藏丹處大石

仍存拜斗餘弟子蒼顏年八十養生世世授遺書



山堂肆考卷一百七十四